

4. Die purgierende Arzney würcken nicht durch die Krafft einisger Qualitet/als der Wärmde/ Kälte/ Feuchte/ oder Trückne / sondern durch eine verborgene Eynschafft vnd eigene Form/nemblich durch die Eynschafft der ganken Substanz / welche durch die Wärmde vnd Himmlische Krafft getrieben / die Feuchtigkeit / so ihr am nechsten verwandt/ an sich zeucht vnd zum Ausgang reizt.

5. In den langwirigen Kranckheiten / vnd welche man criticos zunennen pflegt/ soll man keine purgationes, sondern arcana vnd geheyme Sachen gebrauchen: Sintemal solche Kranckheiten ohne Chymische Grad nicht zuvertreiben.

6. Wann in den langwirigen Kranckheiten purgationes sollen gebraucht werden / soll dasselbige allgemächlich vnd mit der Zeit geschehen.

7. Ob wol die starcke vnd gewaltsame Arzneyen nicht leichtfertig zugebrauchen/ noch der Leib vnbedachtsamb zubewegen / wie Plato in seinem Timæo vnd lang vor ihm Hippocrates auch geschrieben/ welcher seinen guten Freund Democritum mit der Nießwurk vnd andern dergleichen Sachen nicht purgieren wollen: Vermeldent/ daß kein purgierend Arzney zu finden / die die Kräfte des Leibs nicht schwäche vnd von der Substanz etwas hinweg nimmte. Vnd vmb dieser Ursachen willen Aui-cenna nicht vnbillich sagt/ daß ob wol die Arzneyen nicht giftig seyen/ so komme doch derselbigen innerliche Gebrauch die Natur sehr schwehr vnd sawr an: Nichts desto weniger werden zu den eingewurzelten Kranckheiten Antimonialische/ Vitriolische vnd Mercurialische Arzneyen nothwendig erfordert/ deren wir vns billich enthalten solten / wann nicht ein Weg vnd Weise dieselbige zubereiten vnd dem Menschen vnschädlich zumachen/ zugegen/ vnd wir durch die Vnmässigkeit der jetzigen Welt/ als der Aerste Eruehrerin zu ihrem Gebrauch würden gezwungen.

Von dem Turpeto Minerali.

Dieweil vns vnter viel vnd mancherley fürnehmen purgierenden Arzneyen/ von denen wir allhie zuhandeln gedencen/ der Mercurius am aller ersten an die Hand kompt / so ist bey demselbigen zumercken / daß er zwar mit Vnreinigkeiten behafftet / von welchen man ihn doch sehr fein vnd Künstlich kan entledigen.

Vnd dan-
nenhero
sagt viel-
leicht A-
grippa, es
sey zu Er-
haltung
des Le-
bens vnd
Gesund-
heit kein
besserer
Rath/ dan
sich der vn-
gelährten
Aerzte
enthalten /
vnd kein
besserer
Weg zur
Gesund-
heit vnd
hohem Al-
ter als der
vnerfahr-
nen Medi-
corum
mangeln.